



# ILIDŽA

INFORMATIVNI BILTEN OPĆINE ILIDŽA  
BROJ 156 ■ ILIDŽA ■ JANUAR 2017

Ilidžanska bajka



## Data saglasnost "MDA" za provođenje postupka koncesije

Općinsko vijeće na trećoj redovnoj sjednici donijelo je odluku kojom se daje saglasnost "MDA" d.o.o Sarajevo za provođenje postupka dodjele koncesije za istraživanje i eksploataciju mineralnog resursa-dolomita, na lokalitetu Rakovice, te tražilo od Ministarstva privrede Kantona Sarajevo dostavljanje povratne informacije o postupku dodjele koncesije i zaključenom ugovoru.

Privredni subjekt "MDA" d.o.o Sarajevo obratio se Općinskom vijeću zahtjevom za davanje saglasnosti za postupak provođenja dodjele koncesije, uz svu potrebnu dokumentaciju.



Prema Zakonu o koncesijama, naknade za koncesije su prihod kantonalnog budžeta i jedinica lokalne samouprave koje se raspoređuju u iznosu 40 posto budžet Kantona, a 60 posto budžet općine, na čijoj teritoriji se nalazi. Vijeće je podržalo zahtjev, uz zaključak da Ministarstvo privrede Kantona Sarajevo dostavi informacije o svim zaključenim ugovorima sa finansijskim prikazom o dodjeli koncesija na području općine Ilidža.

## Plan i program održavanja, zaštite, rekonstrukcije i izgradnje lokalnih cesta

Jedna od tačaka dnevnog reda bila je i Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža. Komisija za prostorno planiranje, mjesne zajednice, komunalne poslove i ekologiju OV je izrazila nezadovoljstvo zimskim održavanjem cesta i pojedinih saobraćajnica, te predložila Službi za razvoj, komunalne poslove i puteve da poduzme potrebne mjere prema odabranim izvođačima za otklanjanje uočenih nedostataka kao i poduzimanje određenih sankcija za one izvođače koji nisu kvalitetno izvršili poslove na zimskom održavanju. Komisija također, zahtijeva da općinski načelnik što prije izvrši postavljanje inspektora za ceste u Općini Ilidža, što je Vijeće i podržalo. Plan i program održavanja, zaštite, rekonstrukcije i izgradnje cesta je planiran na realnim potrebama normalnog funkcionisanja saobraćaja uz konsultacije i prijedloge organa MZ.

2

## Javni poziv za dodjelu priznanja

Općinsko vijeće Ilidža 26. januara 2017. godine na trećoj redovnoj sjednici u Multifunkcionalnoj sali donijelo je Prijedlog odluke o raspisivanju javnog poziva za predlaganje kandidata za dodjelu priznanja Općine Ilidža. Odlukom Općinsko vijeće raspisuje javni poziv za predlaganje kandidata za dodjelu najvećih priznanja Općine, Zlatnu, Srebrnu plaketu i Zahvalnicu Općine Ilidža.

Priznanja se mogu dodjeljivati pojedincima i kolektivima za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Prijedlozi se podnose u pisanoj formi, sa obrazloženjem i dokumentacijom o ispunjavanju uslova. Mogu se podnositi do 10. februara neposredno putem Centra za pružanje usluga građanima Općine Ilidža ili poštom na adresu, Općina Ilidža-Općinsko vijeće-Komisija za saradnju sa drugim općinama, nagrade, priznanja, praznike i obilježavanje značajnih događaja i ličnosti, ulica Butmirska cesta broj 12, 71.210 Ilidža. Javni poziv bit će objavljen u dnevnim novinama tj. u Oslobođenju, 27. januara i na web stranici Općine Ilidža.



### Informacija o korištenju prostorija mjesnih zajednica za 2016. godinu

Vijeće je na sjednici primilo k znanju Informaciju o uslovima i načinu korištenja prostorija mjesnih zajednica na području općine Ilidža za 2016. godinu. Kako je navedeno u Informaciji prostorije mjesnih zajednica korištene su na način i u skladu sa Odlukom Općinskog vijeća o dodjeli u zakup poslovnih zgrada i poslovnih prostorija na kojima pravo raspolaganja ima Općina Ilidža i Odluke o uslovima i načinu korištenja prostorija mjesnih zajednica na području općine Ilidža. Prostorije mjesnih zajednica, pored administrativnih potreba mjesnih zajednica, korištene su za potrebe sportskih i kulturnih udruženja, nevladinih organizacija, političkih partija, te za ostale potrebe stanovnika općine Ilidža.



### Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Čokić Senada, Čokić Šucre i Šabanović Fatime. Usvojen je i prijedlog rješenja o rješavanju imovinsko-pravnih odnosa u svrhu legalizacije pomoćnog objekta po zahtjevu Hadžić Muhameda i Mensure, te prijedlozi rješenja o rješavanju imovinsko-pravnih odnosa u svrhu prestanka prava korištenja po zahtjevima Bašić Zije, Tolo Ljeposave, Velić Muje i Korać Hane. Usvojen je i prijedlog Odluke o prestanku statusa nepokretnosti u općoj upotrebi po zahtjevu Korać Hane.

### Emina Musić imenovana za zamjenika pravobranioca

Emina Musić, imenovana je za zamjenika općinskog pravobranioca. Nakon izglasanog prijedloga o imenovanju, Emina Musić je položila svečanu zakletvu.



### **Na posljednjim lokalnim izborima 2016. godine potvrdili ste mandat, osvojivši 13.343 glasa, šta za vas predstavlja ovaj rezultat?**

Ovom prilikom želim još jednom da zahvalim svojim sugrađanima, što su izašli na izbore 2. oktobra 2016. godine, ukazali mi povjerenje i dali veliku podršku da i dalje budem njihov predstavnik. Rezultati izbora od 13.343 glasa nisu mali. Moram reći da imam i veliku obavezu da u naredne četiri godine radim ubrzanije i efikasnije za dobrobit općine i svih građana. Građani Ilidže mogu očekivati da ću raditi u interesu stvaranja uslova za zapošljavanje, obrazovanje, rješavanje komunalnih, infrastrukturnih, socijalnih i drugih problema građana. Naša Ilidža ima puno problema, neki problemi nadilaze moju nadležnost, ali pokušat ćemo svaki zajedno riješiti. Naglašavam da ću i dalje biti načelnik svih građana i pozivam ih da zajedno rješavamo nadolazeće probleme i da od Ilidže napravimo centar ugodnog i lijepog življenja. Želim da Ilidži vratimo mjesto koje joj pripada.

### **Općinsko vijeće Ilidža ima predstavnike devet stranaka i broji 31 vijećnika. Vaše mišljenje?**

Devet stranaka u Vijeću, odnosno njihovih predstavnika govori koliko je Ilidža raznolika. Smatram da su ovi ljudi ozbiljni i odgovorni, da prije svega vole i osjećaju Ilidžu. Normalno je da smo svi lokalpatrioti. Mislim da će to biti tim koji će raditi za dobrobit građana bez obzira na političku opciju. Ti ljudi su birani, neko im je dao povjerenje, neko smatra da oni mogu poboljšati situaciju, samo neka rade ono što su govorili u toku predizbornih obećanja. Nemojmo samo kritikovati urađeno. Slažem se da uvijek može bolje, ali urađeno je onoliko koliko se moglo. Jedno sam siguran, da ćemo biti partneri i dobar tim koji će pomjerati granice.

### **Na koje projekte ste posebno ponosni i šta je to što izdvajate kao svoj uspjeh u 2016. godini?**

**4** Općina Ilidža ima bogatstvo voda, šuma i

poljoprivrednog zemljišta, a najveće bogatstvo su ljudi. Nabrojat ću samo neke projekte koje smo uradili u 2016. godini. Okončali smo treću fazu izgradnje saobraćajnice Ilidža-Hrasnica i tu je bilo izdvajanje 1.140.000 KM, saobraćajnica uz rijeku Željeznicu, od mosta Alije Izetbegovića do ratnog mosta, za koje smo utrošili 457.796 KM. Mala Aleja dobila je potpuno novi izgled, i tu su bila izdvajanja od 700.000 KM. Samo za izgradnju saobraćajnica od rekonstrukcije do održavanja dato je 3.184.302 KM, za izgradnju i rekonstrukciju rasvjete po MZ uloženo je 220.000 KM. Semaforizacija, saobraćajna signalizacija 181.700 KM, za izgradnju vodovodne sekundarne mreže u MZ Rakovica i Blažuj uz učešće građana 415.492 KM, za izgradnju i rekonstrukciju kanalizacione mreže po MZ 750.000 KM, za regulaciju i uređenje vodotoka na području naše općine kao i za rješavanje imovinsko-pravnih odnosa 750.563 KM, za rekonstrukciju mostova 300.000 KM, izgradnju sportskih ploha 30.000 KM kao i 30.000 KM za izgradnju i održavanje zabavnih parkova. Radili smo i sanaciju postojećih skloništa i izgradnju skloništa u sklopu sportske dvorane u Sokolović Koloniji, a tu je uloženo 911.285 KM, za nastavak izgradnje Sedme osnovne škole 322.227 KM. Asfaltirane su i 22 ulice. Stipendirano je 120 djece slabijeg imovnog stanje, 40 djece bez roditelja i 309 nadarenih učenika i studenata. Za obnovu i sanaciju škola iz budžeta izdvojeno je oko 1.300.000 KM. Za sport 300.000, 300.000 KM za kulturu, 300.000 KM za obrazovanje. Ilidžanski festival je također manifestaciju koju smo finansirali i na koju smo posebno ponosni. Mislim da je urađeno mnogo, ali ipak uvijek kažem da možemo još više i bolje.

### **Šta su Vaši sljedeći koraci, prioriteti u 2017. godini?**

Političkom stabilnošću moramo poslati poruku investitorima da je njihov kapital siguran na Ilidži. Saradnju ćemo nastaviti sa Kantomom i Federacijom kao i sa drugim nivoima vlasti. U tom pravcu ozbiljno se razgovora da Ilidža bude sjedište Vlade Federacije BiH. Izgradnja zgrada planirana je na mjestu Zavoda za poljoprivredu FBiH.

Općina Ilidža će i u narednom periodu mog mandata nastaviti svoj dinamičan, ekonomski, obrazovni, turistički, ekološki, infrastrukturni, kulturološki, sportski i društveni razvoj. Nastavit ćemo i dalje brigu o ljudima i porodicama koji su svojim životima omogućili da živimo i razvijamo našu općinu, a posebno ćemo se zalagati za smanjenje broja građana

na socijalnoj potrebi. Pomagat ćemo i dalje naše škole, vrtiće, Dom zdravlja i ambulante porodične medicine, Četvrtu policijsku upravu. Planirali smo i izgradnju škole u MZ Stup.

Zagovaramo ideju da se na prostoru nekadašnje Šumarske škole napravi jedan srednjoškolski centar, u kojem bi bile smještene škole za turističke vodiče, strane jezike, informatičare.... Također, vode se razgovori da Ilidža bude sjedište Centra za tehnologiju, gdje bi se školovalo oko 200 studenata, budućih stručnjaka za softvere.

I u 2017. nastavljamo sa projektom vodosnabdjevanja Rakovice i nećemo stati dok se ne okonča projekat. Uložili smo do sada 17 miliona KM. Slijedi i nastavak izgradnje saobraćajnice Ilidža –Hrasnica . U ovoj godini izgradit ćemo jedan kružni tok u Sokolović Koloniji ( kod Genetove kafane). Svakako, privode se kraju i projekti regulacije rijeka Bosne, Dobrinje i Zujevine. Asfaltirat ćemo i ulice po prioritetima kako je istaknuto na savjetima MZ prilikom rasprave o Budžetu. U ovoj 2017. godini planiramo stipendirati oko 500 studenata i đaka.

Nastavit ćemo sa izradom planske dokumentacije, kojom se planira i stvara mogućnost za izgradnju infrastrukture, objekata društvenog sadržaja, privrednih, poslovnih , stambenih objekata, čime se stvaraju i uslovi za legalizaciju velikog broja bespravniha objekata koji su naša realnost .

Nadamo se i da krećemo sa projektom Nova Ilidža. Stekli su se preduvjeti. Prema odobrenju Federalnog Ministarstva prostornog uređenja i stručnog mišljenja Federalnog zavoda za zaštitu spomenika , urađeni su i predhodni istražni radovi od strane Instituta za arheologiju Filozofskog fakulteta, za arheološko područje –prahistorijsko naselje u Butmiru koje je proglašeno nacionalnim spomenikom .To je prva faza. Investitori čekaju naše spore procedure koje samo koče razvoj. Ali naš razvoj niko ne može zaustaviti. Ilidža svakim danom postaje ljepša. Upravo je ovih dana Udruženje arhitekata BiH proglasilo najljepšom građevinom u BiH, zgradu lociranu na području Ilidže. I ona kao i mnoge druge građevine i stambeni objekti Ilidži dodaju epite moderne lokalne zajednice.

#### **Da li ste zadovoljni razvojem privrede i koje su, po vama prepreke bržeg privrednog razvoja?**

Stanje nije sjajno. Osnovni problem je birokratija. To je rak rana našeg društva. Imamo nevjerojatne resurse, koji se često ne mogu eksploatisati zbog nelogičnih zakona, propisa i procedura. Sam proces osnivanja firmi je predug, preskup i prekomplikovan. Gušimo privrednike skupim i nelogičnim procesima koji su samo tako komplikovani u BiH. Jedan od razloga zašto nismo zanimljivi je i da nismo učinili dovoljno da reformišemo institucije. I sistem obrazovanja nije prilagođen potrebama realnog sektora. Određena zvanja sa VSS, su hiperproduktivna, čime se gomilaju ljudi na birou, dok zvanja koja su potrebna privredi se ne subvencioniraju i ne promoviraju na adekvatan način.

Mi imamo problema i sa nedostatkom poduzetničkog duha. Ljudi radije žele karijeru u državnom aparatu, nego u realnom sektoru. Moramo ih ohrabriti da pokreću biznis. Iako imamo više od 2.500 firmi koje imaju sjedište na Ilidži nismo zadovoljni, jer Ilidža sa svojim potencijalima, posebno ljudskim, može mnogo bolje. Nastojat ćemo popraviti stanje. Uvjeren sam da ima potencijala i da će privreda napredovati u budućnosti.

#### **Primjetan je veliki broj stranih investitora, posebno onih sa Bliskog istoka, koji ulažu na području naše općine?**

Općina Iliža je otvorila odavno vrata stranim investitorima. Mi ih ne djelimo na investitore s Bliskog istoka ili Evrope, za mene su oni investitori. Ja ih ne dijelim prema porijeklu, već prema namjerama. Oni se žale na komplikovan sistem jer se susreću sa mnoštvom nelogičnosti tokom pribavljanja različitih i mnogobrojnih saglasnosti, kolokvijalno bespotrebne papirologije bih ja rekao.

Pred svima nama, nosiocima vlasti je velika obaveza, pa i izazov, da predložimo, utičemo na zakonodavnu vlast da maksimalno pojednostavi zakonsku regulativu kako bi svi zainteresovani i potencijalni investitori započeli i u što kraćem roku pribavili potrebnu dokumentaciju, te započeli vlasti biznis. Zajedničko svima njima je da su očarani našim prirodnim ljepotama, bogatom historijom te su iznenađeni kako smo dobri domaćini.

Činjenica je da generalno imamo problema, ali volja i želja da svakim danom uradimo više, ljepše, bolje, siguran sam da je garancija uspjeha i dobrih namjera, jer naši građani to zaslužuju.

#### **Ilidža je prepoznatljiva kao kao poželjena i prestižna turistička destinacija, šta namjeravate uraditi za proširenje turističke ponude?**

Moram se pohvaliti da smo mi četvrta općina po razvoju, a općina smo sa najvećim brojem noćenja, i jako smo ponosni na tu činjenicu. Raduje me i da imamo značajan napredak u sferi uslužnih djelatnosti. Ilidža za razvoj turizma ima osim prirodnih zavidne i infrastrukturene resurse. Raspolaze sa 23 smještajna objekta i to 18 hotela koj imaju 1.600 soba i 3.500 kreveta što čini 1/3 ukupnog kapaciteta u Kantonu Sarajevo. Mi smo prvi u Kantonu po broju dolazaka i ostvarenih noćenja, a u samom vrhu smo i u BiH.

Samo u 2016. godini, za deset mjeseci, Ilidžu je posjetilo 100.227 gostiju i ostvarilo 215.707 noćenja. Okončane su i velike investicije na hotelsko-turističkim objektima. Imamo i hotelsko naselje Oaza sa pet zvjezdica, sa 12 stambenih vila, 60 apartmana, 240 ležaja te restoran za 200 mjesta. Izdvajam i hotele se pet zvjezdica Hills, koji ma 261 sobu, kongresnu salu, dječiju igraonicu, Malak Regency hotel, koji ima 174 luksuzne sobe, konferencijske sale, wellness spa centre i dva restorana, a tu je i Krone. Mogućnosti višestruke ponude koju pruža banjско-rehabilitacijsko i hotelska kompanija Hoteli Ilidža i dalje su nešto što jedinstveno na ovim prostorima.

Ilidža ima značajne kapacitete i za zdravstveni turizam uz pomenuti banjско rekreacioni kompleks, a imamo niz privatnih poliklinika: Eurofarm, Sanasa, Dr. Nabil, Pro lab, New Life IVF centra- Novi život.

Prepoznatljivi smo i po Velikoj aleji i fijakerima, Vrelu Bosne. Tu je i tunel D-B koji se je ostvario oko 120.000 posjeta. Ilidža je i obrazovni centar. Ukratko Ilidža je veliko gradilište i mjesto za investiranje u različite grane privrede.

## Uručeni ugovori o stipendiranju djece slabijeg imovnog stanja, djece bez oba roditelja i djece bez roditeljskog staranja

Općinsko vijeće Ilidža na drugoj redovnoj sjednici donijelo je Odluku o stipendiranju učenika i studenata slabijeg imovnog stanja u školskoj/akademskoj 2016/2017. godini u ukupnom iznosu od 135.250 KM. Odlukom će se stipendirati ukupno 162 učenika i studenta, od toga 107 učenika i 55 studenata. Mjesečni iznos stipendije za učenike je 75 KM, a za studente 100 KM. Stipendije će dobijati 10 mjeseci.

Vijeće je donijelo i Odluku o stipendiranju djece bez oba roditelja i djece bez roditeljskog staranja u školskoj/akademskoj 2016/2017. godini u iznosu od 38.700 KM, a stipendirat će se 39 djece, od toga 12 studenata, 11 učenika srednjih i 16 učenika osnovnih škola. Učenicima srednjih i osnovnih škola mjesečni iznos stipendije je 75 KM, a studentima 100 KM. Isplaćivat će se 12 mjeseci.

Tim povodom načelnik Općine Ilidža prof. dr. Senaid Memić, 11. januara 2016. godine u sali Općine Ilidža svečano je uručio ugovore o stipendiranju djece slabijeg imovnog stanja i djece bez oba roditelja i djece bez roditeljskog staranja.

„Dodjela stipendija je naša pomoć u vašem školovanju, a ujedno i podrška obrazovanju i vaše stipendiranje je investiranje u našu budućnost. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.



## Prijem za direktore osnovnih i srednjih škola

Povodom početka drugog polugodišta školske godine, načelnik Općine Ilidža prof.dr. Senaid Memić 31. januara 2017. godine upriličio je prijem za direktore osnovnih i srednjih škola sa područja ove općine.

Na prijemu se razgovaralo o pripremama koje su škole izvršile pred početak drugog polugodišta, problemima sa kojima se škole susreću u svom svakodnevnom radu, te uslovima u kojima se odvija nastavni proces. Direktori su informisali načelnika Memića o trošenju sredstva koje je Općina izdvojila u namjenske svrhe za poboljšanje nastavnog procesa. Podsjećamo da je Općina Ilidža u školskoj 2016/2017. izdvojila za sanaciju, adaptaciju i nabavku nastavnih sredstva i opreme 1.136.000 KM.

Načelnik Memić rekao je da će Općina Ilidža i dalje biti podrška i osnovnim i srednjim školama u realizaciji njihovih svakodневnih aktivnosti, te da se direktori sa inicijativama i dalje mogu obraćati Općini Ilidža, bez obzira što nadležnost nad radom škola općina nema. Memić je naglasio da je jedan od prioriteta u radu omogućavanje što boljih uslova za učenje ilidžanskoj djece prema kojoj ima ogromnu obavezu.



## Nastavak izgradnje ceste Ilidža-Hrasnica i u 2017. godini

Izgradnja tzv. brze ceste Ilidža-Hrasnica nastavit će se u ovoj godini, a za tu namjenu je planirano 400.000 KM. Potvrdio je to Mirsad Čaušević, pomoćnik načelnika za razvoj, investicije i komunalne poslove, dodavši da će se paralelno raditi na rješavanju imovinsko-pravnih odnosa.

"Svake godine kontinuirano se radi na izgradnji brze ceste. Trenutno se radi projektovanje da na postojećoj raskrsnici napravimo kružni tok u Sokolović -Koloniji" izjavio je Čaušević.



## Još jedna grupa volontera uspješno završila rad

Povodom uspješno obavljenog volonterskog rada u organu uprave Općine Ilidža u trajanju od 12 mjeseci načelnik prof.dr. Senaid Memić 24. januara organizirao je prijem za volontere. Riječ je o volonterima sa završenom VSS i to njih 75.

Iskustvom stečenim tokom proteklih mjeseci u Općini ostvarili su pravo polaganja stručnog ispita nakon čega će biti konkurentni na tržištu rada. Kako je rekao načelnik Memić volonteri su veoma uspješno obavili rad u Općini, te pokazali izuzetnu spremnost na usvajanje novih znanja i vještina.

"Vi ste budućnost BiH. Oslonite se na svoje znanje i svoje sposobnosti. Ne posustajte i ne gubite nadu nikad. Volio bih kada bi svi vi radili one poslove za koje ste se školovali, ali nemojte da vam bude isponiženja raditi i bilo koje druge časne poslove. Nemojte biti ulizice i poltroni. Ne prodajte obraz i ne ponižavajte se. Nadam se da ste tokom ove godine naučili mnogo i da će stečeno iskustvo u budućem životu biti vam od koristi. Želim vam puno sreće i uspjeha i na privatnom planu" izjavio je, između ostalog načelnik Memić.

Prema riječima volontera iskustvo stečeno u Općini Ilidža im je od velike koristi i nadaju se da će im pomoći pri pronalasku posla, a zahvalili su se ujedno i na šansi koja im je pružena.

Inače u Općini Ilidža volontiralo je 247 mladih ljudi sa VSS spremom.

## Oproštajno druženje sa 35 volontera

Još jedna grupa volontera, njih 35, okončala je svoj jednogodišnji volonterski staž u Općini Ilidža. Tim povodom 31. januara 2017. godine načelnik Općine Ilidža, prof.dr. Senaid Memić i Dženana Čenanović, Šef Stručne službe Općinskog načelnika, organizovali su oproštajno druženje sa mladima koji su tokom protekle godine stekli nova, značajna znanja i radno iskustvo.

"Iskustvo koje ste stekli u Općini je nadam se bila dobra prilika za sticanje novih saznanja, kako bi svoje znanje koje ste stekli na fakultetu, upotpunili u praktičnom smislu i sutra bili konkurentni i spremni da učestvujete na tržištu rada. Nadam se da će ova godina biti urezana doživotno kao pozitivno iskustvo. Moja su vam vrata uvijek otvorena. Život nije lak. Kad ste u nevolji budite ponosni. Strpljenje dovodi do toga da iz svake nevolje možete izaći. A ja sam siguran da ćete vi naći svoju priliku koju morate zgrabiti. Budite jaki kao ljudi i želim vam mnogo sreće" rekao je, između ostalog, načelnik Memić.

Bernisa Baljak, dipl. ekonomistica, koja je posljednju godinu provela volontirajući u Mjesnoj zajednici, u ime svih volontera zahvalila se na ukazanoj prilici koju su dobili. Općina Ilidža im je bila godinu dana kuća gdje su dolazili sa osmijehom i gdje su naučili mnogo, rekla je Baljak.



## Održana javna tribina o RP "Pejton"

U prostorijama MZ Centar, 19. januara održana je javna tribina o konceptu Regulacionog plana "Pejton".

Prisutni građani su upoznati sa osnovnom koncepcijom Regulacionog plana, a bila je to prilika i da iznesu mišljenje, prijedloge i sugestije.

Također, u roku od 15 dana svi građani mogu to učiniti i pisanim putem i predati na protokol Općine za nadležnu resornu službu.



## Novčani pokloni za najstarije stanovnike Ilidže

I ove kao i predhodnih godina, Općina Ilidža je svim svojim stanovnicima starijim od 80 godina, kojih na području općine ima 1.957, podijelila novčane poklone, po 70 KM. Za njih tridesetak najstarijih stanovnika, načelnik prof. dr. Senaid Memić, 12. januara 2017. godine priredio je prijem i druženje uz kafu i sok u prostorijama Općine. „Sretan sam što imam priliku i mogu da vam ovim skromnim poklonom ukažemo da vas, kao najstarije građane naše opštine, nismo zaboravili i da je ovo mali znak pažnje u znak zahvalnosti za sve ono što ste uradili za državu, lokalnu zajednicu i za nas mlađe. U nadi da ćemo vam bar malo olakšati staračke dane želim vam puno dobrog zdravlja uz želju da još dugo godina poživite i da se i iduće godine opet vidimo i sretnemo“, kazao je načelnik Memiću svom obraćanju najstarijim sugrađanima.

8



## Prijem za 56 nekadašnjih uposlenika

U zgradi Općine Ilidža 16. januara je organizovan tradicionalni novogodišnji prijem za penzionere koji su radni vijek proveli radeći u Jedinostvenom općinskom organu uprave ove općine. Za njih 56, načelnik prof.dr. Senaid Memić je pripremio prigodne poklone, te novčani iznos po 70 KM. Svi su dobar dio, ako ne i cijeli radni vijek, proveli u Općini Ilidža pa tokom prijema nije nedostajalo tema za razgovor evociranja uspomena, a i radosti što vide jedni druge. Mnogi već imaju nove preokupacije, a sve najljepše i dobro zdravlje poželio im je načelnik, prof.dr. Senaid Memić.

"Drago mi je što vas vidim u ovolikom broju. Želim da ovi susreti budu tradicija i da u ovim vremenima kakva jesu, susrećemo se češće da razgovaramo i vidimo eventualno šta možemo pomoći jedni drugima" rekao je, između ostalog načelnik Memić. On je zahvalio penzionerima na istinskom trudu kojeg su pružali u toku svog radnog vijeka "praveći" lokalnu upravu, te istakao da su vrata općine i njegovog kabineta za njih uvijek otvorena sa ličnih aspekata i šire društvene zajednice

Penzioneri su zahvalili načelniku na pozivu i istakli da im prijem mnogo znači, zbog iskazanog poštovanja i ljudskosti načelnika prema ovoj populaciji.







## Obilježena 75. godišnjica Igmanskog marša

Igmanski marš je jedan od najvažnijih partizanskih pohoda na prostorima bivše Jugoslavije u Drugom svjetskom ratu. I naši predstavnici Udruženja antifašista i boraca NOR-a Ilidža učestvovali su u organizaciji obilježavanja 75. godina od ovog događaja. Nikola Babić, predsjednik UABNOR-a Ilidža prisustvovao je prijemu, u organizaciji SABNOR-a Kantona Sarajevo, gdje je dobio priznanja -Spomen Medaljom "60 godina Ruskog Saveza veterana".

U jutarnjim satima delegacija je 28. januara 2017. godine položila cvijeće na spomen obilježja u Osjeku i na Vrelu Bosne, u prisustvu više od hiljadu antifašista iz Kantona Sarajeva, Srbije, Hrvatske, Crne Gore, Slovenije i Makedonije i odale dužno poštovanje borcima NOR-a. Zatim su se uputili na Veliko polje.

U ime Općinskog načelnika goste je pozdravio Senad Memić, koji je izrazio zadovoljstvo prisustvom velikog broja učesnika sa prostora šire regije, a učesnicima je zaželio ugodan boravak na Ilidži i Igmanu. Memić je pozvao sve prisutne da dođu i naredne godine i da obilježe 76. godina.

"Manifestacija je bila veličanstvene, u koloni je učestvovalo oko 5000 učesnika, a na Velikom polju procjenjuje se prisustvo od 15.000 do 20.000 građana. Ovi ljudi su još jednom poslali poruku da su protiv svih oblika fašizma" kazao nam je Nikola Babić.

Nakon oficijelnog programa podijeljen je i vojnički grah i čaj za prisutne



## Gorska služba spašavanja učestvovala u akciji pronalaska nestale osobe

Da Gorska služba spašavanja Ilidže pomaže svima svjedoči događaj od 23. januara 2017. godine. Prema riječima Salema Bilalovića, rukovodioca Gorske službe spašavanja Ilidža, učestvovali su u akciji spašavanju nestale osobe na lokalitetu Igmana.

"Dojavu o nestanku smo primili od porodice, a uključili smo se odmah u akciju potrage. U jako kratkom vremenu, zajedno sa Gorskom službom Kantona i Novog Grada, pronašli smo nestalo lice sa blažim ogrebotinama, povredama i a pothlađenog. Nakon pružanja prve i urgentne medicinske pomoći predali smo ga službi hitne medicinske pomoći" rekao je Bilalović.

## Posjeta Domu penzionera "Green"

Načelnik Općine Ilidža prof.dr. Senaid Memić posjetio je 12. januara Dom penzionera "Green" u Hrasnici. Tom prilikom uručio je po 70 KM korisnicima koji imaju više od 80 godina, njih 32.

Kako su rekli korisnici Doma koji su izrazili zahvalnost načelniku na novčanim sredstvima, najvažnije tokom posjete je to što je "donio" dobru volju i razumijevanje.

"Kad spomenemo riječ starost, gotovo je uobičajeno da mislimo na onemoćalog i bespomoćnog čovjeka, ali nije uvijek tako. Godine idu i ne možemo kazaljku našeg životnog sata zaustaviti ili pomaknuti unatrag. To su neizbježne pojave, ali to ne znači da vaš duh je star da se vi ne radujete svakom danu kao i svi ljudi. Želim da vam ova sredstva bar malo olakšaju dane i da shvatite samo kao mali znak pažnje i brige o vama, jer niste zaboravljeni" rekao je, između ostalog načelnik Memić.

Istog dana posjetio je i porodicu Durmo, dedu Emina i nanu Šuhretu u Lasici, kojima je Općina izgradila i kuću, te im uručio pored novčanih sredstava i paket hrane.

## Pozitivno poslovanje JP "Ilidža"

Na području općine Ilidža, skoro već dvije godine posluje i uspješno se razvija Javno preduzeće za obavljanje komunalnih i drugih djelatnosti od javnog interesa Općine Ilidža „Ilidža“ društvo sa ograničenom odgovornošću, koje je osnovano odlukom Općinskog Vijeća. Preduzeće trenutno zapošljava 15 uposlenika, a prvenstveno je osnovano zbog održivog upravljanja, zaštite i održavanja dodijeljene imovine u vlasništvu Općine Ilidža i efikasnije realizacije komunalnih i drugih djelatnosti od općeg interesa.

Proteklu poslovnu godinu JP „Ilidža“ d.o.o. okončalo je sa uspješnim poslovnim rezultatom, a u narednoj 2017. nastoje raditi na podizanju kvaliteta života građana.

"JP „Ilidža,, nastoji u svakom trenutku pružiti kvalitetne komunalne usluge građanima Općine Ilidža i na toj osnovi nastoji izgraditi prepoznatljiv brend ne samo u našoj općini već i šire. Kvalitetnim, kontinuiranim i ažurnim obavljanjem svojih poslova zaposlenici JP „Ilidža“ d.o.o. žele ostaviti trajna dobra kao rezultat rada" kaže nam direktor ovog preduzeća Adnan Cvijetić. U razgovoru je naveo samo neke od aktivnosti.

"Radnici JP „Ilidža“ uspješno su održavali čistoću na javnim površinama dva puta sedmično na ukupnoj površini od 160.000,00 m<sup>2</sup>, što je podrazumijevalo održavanje higijene na zelenim površinama, dječijim igralištima i sportskim plohama, ručno čišćenje i prikupljanje smeća sa odvozom na gradsku deponiju. Kosili su i travu na zelenim površinama i to tri puta godišnje. Posebno su bili angažovani u zimskoj sezoni i to na zimskom održavanju pješačkih staza i platoa. Osim mašinskog i ručnog uklanjanja snijega i leda, redovno je vršeno posipanje cesta" rekao je

## Za zimsko održavanje cesta zadužene četiri firme

Za zimsko održavanje cesta na području općine Ilidža zaduženi su četiri firme i to konzorcij Twi d.o.o i Almy Transport d.o.o., konzorcij Braća Mujić d.o.o i HP Investing d.o.o., firma Sarajevoputevi d.d. i JP "Ilidža". Konzorcij Twi d.o.o i Almy Transport d.o.o. čiste u MZ Rakovica, MZ Blažuj i MZ Osjek. Konzorcij Braća Mujić d.o.o i HP Investing d.o.o. zadužene su za ulice u MZ Hrasnica I, Hrasnica II, Sokolović- Kolonija, Lužani, Vreoca, Vrelo Bosne. Sarajevoputevi d.d. čiste MZ: Ilidža Centar, Otes, Stup, Stup II, Stupsko brdo, Butmir, te Donji Kotorac. JP "Ilidža" održava pješačke staze.

10

Cvijetić.

Radnici preduzeća su uspješno održavali korita Večerice, Rakovičkog potoka, Dobrinje, Buničkog potoka, a čistili su i potok Bare.

"Na osnovu sporazuma o održavanju javnih česmi, fontana i centralnog spomen obilježja zaključenog na godinu dana, održavali smo i 18 javnih česmi, dvije fontane i centralno spomen obilježje, što je podrazumijevalo svakodnevni obilazak vodnih objekata, praćenje ispravnosti, funkcionalnosti, te održavanje higijene i njihove okoline. Održavali smo i uređaje i postrojenja lokalne kanalizacione mreže na području općine Ilidža, čime je obuhvaćeno pet objekata lokalne kanalizacione mreže uz svakodnevni obilazak" naglašava Cvijetić. Radnici preduzeća su radili na čišćenju Ljetne pozornice Ilidža u toku priprema za održavanje Ilidžanskog festivala, a sadili su i 64 komada grmlja juniperus, 243 komada tuje, te 42 jasena. Radnici preduzeća su radili i na održavanju putnog i zaštitnog pojasa saobraćajnica, što je podrazumijevalo krčenje, orezivanje i uklanjanje (mašinski i ručno) samoniklog grmlja (zaštitni pojas ceste) sa prikupljanjem biljnog materijala, te utovarom i odvozom. Uspješno su radili na održavanju kanala i rigola" izjavio je Cvijetić.





### **Prijem za ekipu Crvenog križa Ilidža**

Načelnik Općine Ilidža prof. dr. Senaid Memić 1. februara 2017. godine upriličio je prijem za ekipu Crvenog križa Ilidža, a povodom osvajanja prvog mjesta na 15. državnom takmičenju iz pružanja prve pomoći.

„Čast mi je i zadovoljstvo biti danas sa vama koji ste dostojanstveno predstavljali općinu Ilidža na takmičenju iz pružanja prve pomoći, te koristim ovu priliku da vam čestitam na uspjehu i zaželim još puno dobrih rezultata. Mi ćemo vam i dalje pružati podršku u vašem radu,“ kazao je načelnik Memić u svom obraćanju članicama ekipe Crvenog križa.

Ekipa Crvenog križa Ilidža šestorostruki je državni prvak u ovoj oblasti, a osvajanjem prvog mjesta na Državnom takmičenju održanom u Mostaru 12. decembra 2016. godine ekipa se plasirala na Evropsko takmičenje iz pružanja prve pomoći 2017. Za ekipu Ilidže državnog prvaka u pružanju prve pomoći takmičile su se Ajša Jašarević, Belma Muratović, Medina Selimić, Amra Muratović, Leila Plojević i Selma Suljić.

Za osvajanje prvog mjesta na Državnom prvenstvu načelnik Memić im je ovom prilikom uručio novčane nagrade u iznosu od po 100 KM.

### **Spajalica : Novi način učenja**

Na Ilidži i u Novom Gradu otvorena je Brainobrain akademija koja djeci nudi potpuno novi način učenja. Riječ je o inovativnom međunarodnom programu razvoja intelektualnih i životnih vještina kod djece uzrasta od 4 do 14 godina. Cilj programa je omogućiti djeci da uz inovativne tehnike i drevne azijske metode nauče razvijati i koristiti svoje potencijale. Djeca na kraju postižu odlične rezultate iz matematike, ali im ove tehnike pomažu i u jačanju samopouzdanja, razvijanju brzine i tačnosti, fotografskog pamćenja, vizualizacije, i u konačnici postaju kreativnija i odlučnija.

Upis je u toku, a roditelji sve potrebne informacije o Brainobrain akademiji mogu pronaći na web stranici [www.djeca.eu](http://www.djeca.eu) ili u [Brainobrain Centru Ilidža, u kojem se nalazi Info-desk.](#)

## **Uspješno okončana škola skijanja**

U organizaciji Općine Ilidža i RVI organizovane su dvije smjene škole skijanja na Malom polju na Igmanu. Više od 150 učenika osnovnih škola sa područja ove općine boravilo je na Igmanu, naučili i usavršili tehnike skijanja.

U okviru ove obuke obezbijeđen je i prijevoz, instruktori, ski karte i užina. Za djecu je 19. januara bio priređen i roštilj.

Adna Imamović, učenica Šeste osnovne škole koja je pohađala školu skijanja rekla nam je da je bila prezadovoljna i da su uslovi za skijanje odlični.

"Osim što smo skijali mi smo ovdje upoznali mnogo drugara. Družili se, smijali i udisali svjež zrak. Sretna sam što sam bila ovdje"kazala je Adna Imamović.

Općina Ilidža je za ovaj projekat izdvojila 10.000 KM. Načelnik Općine Ilidža prof. dr. Senaid Memić naglasio je da Općina Ilidža realizuje mnoge projekte za osnovce i da će i u budućnosti se realizovati još sličnih projekata.

"Cilj projekta je da se učenicima tokom zimske sezone omogući boravak na snijegu kako bi naučili osnovne elemente skijanja, a ujedno i da razvijaju drugarstvo, timski rad, upornost, volju i odlučnost" dodao je načelnik Memić.

Predsjednik RVI Općine Ilidže Esad Delić pohvalno je ocijenio zajednički projekat Općine i Udruženja RVI.

"Jedan od zajedničkih projekata sa Općinom koji uspješno realizujemo je projekat „Škola skijanja“. Angažovali smo nastavnike tjelesnog i zdravstvenog odgoja kao i stručnjake iz oblasti skijanja, a obezbijedili smo za djecu i užinu i topli napitak. Kad vidimo kako se uspješno spuštaju na skijama, njihov osmijeh i razdraganost, sve je potvrda da je projekat odličan" izjavio je Delić.





## Meris Muhović najbolji sportista BiH

Meris Muhović, takmičar Karate kluba Champion i trener mlađih takmičarskih selekcija proglašen je najboljim sportistom u 2016. godini, 26. januara 2017. godine u Narodnom pozorištu u Sarajevu, na manifestaciji koja je održana u organizaciji Sportskog saveza BiH.

Karatista Meris Muhović je imao uspješnu godinu u kojoj je ostvario dvije srebrene i jednu zlatnu medalju na velikim takmičenjima, a to ga je kvalifikovalo za osvajanje ovakve značajne nagrade, prve u njegovoj karijeri.

Nakon osvajanja nagrade, član KK Champion Muhović je održao govor i zahvalio se svima koji su bili zaslužni za njegove rezultate.

"Zahvalit ću se ljudima koji su direktno i indirektno utjecali na moj rezultat. To su moja porodica, moji roditelji, moja braća i moja sestra. Tu su moje klupske kolege bez kojih moji rezultati ne bi bili mogući. Na ovom mjestu prije 14 godina stajao je moj uzor, moj trener, moj mentor i moj brat, koji je imao viziju da napravi nešto veliko što će ostati i generacijama poslije i on je u toj viziji i uspio. Veliko hvala mom bratu Denisu Muhoviću", kazao je Meris Muhović.

U organizaciji Sportskog saveza Bosne i Hercegovine 26. januara 2017. organizovana je dodjela priznanja za najbolje sportiste naše zemlje u 2016. godini. Nagrade su dodijeljene u desetinama kategorija, a jedna od najznačajnije pripala je našem Merisu Muhoviću.